

ni hoste tutandam suasionibus, adhortationibus incitare. Erant intra Leucosiæ moenia mille ac trecenti Itali pedites; ordinum tria millia; incolarum duo, quibus ære publico stipendia persolvebantur: sexcenti hastis, ac fistulis ferreis absque gladiis armati; ab Cypria nobilitate ex domesticis servis proprio ære adscripti mille; Epirotarum equites quingenti, pedites ducenti; tormentorum magistri e Cypro ducenti, ex Italia ducenti ac sexaginta; agrestium hominum octo, fossorum quatuor millia; reliqua iners, atque inutilis turba, ut eorum, qui Leucosia continebantur, numerus quinquaginta millium summam conficeret; qui impares licet ad hostes repellendos, atque ad urbem diutius tutandam censerentur, Italico præsertim peditatu, in quo summa belli sita erat, imminuto, ac prope exhausto; attamen imperatoris virtute errata hominum, ac fortunæ aliqua ex parte corrigi potuissent, si eum virum nacta Cyprus esset, qui prudentia, consilio, fortitudine periclitanti egregiam opem tulisset. Verum, Laurentio Bembo, legato, defuncto, Nicolaus Dandulus successerat, cujus ad tantum onus sustinendum neque par animus, neque virtus erat; inani quadam prudentiæ, atque indefessi roboris opinione ad eam dignitatem sublatus, ceterum obtuso ingenio, nullo fere rerum usu ad magna obcunda munera assuetus, in quo optima sæpe consilia iracundia, familiari ejus vitio, pervertebantur. Is igitur appulsu Turcicæ classis percussus, neque expediti quidpiam consilii capere, neque ubi opus erat suppetias ferre, neque quidquam, ut in summis periculis constitutos cordatos viros decet, prudenter administrare noverat: nondum ex fossis, uti oportuerat, egesta humus; nondum militibus impertita tuendæ urbis munia; nondum incolarum copiarum evocata; civitas commeatu parum instructa. Cum igitur tot incommodis extemplo obviam eundum esset, publico edicto cautum, ut quæ quisque in agris frumenta caperet, in urbes convehendo sua efficeret; at illorum magna pars in pagis agrisque relicta, hostibus præda fuit. Copiarum delectus magna cum celeritate habitus, qui prius ex legionariis dimissi fuerant, regredi iussi.

Dum hæc a nostris geruntur, atque de urbe defendenda, de hostium conatibus impediendis consulitur, Turcæ, propius admoto exercitu, tentoria explicant, tormenta disponunt, castra,

*Nicolaus
Dandulus
summus in
Cypro præ-
fectus, &
ejus des-
idia.*